



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail: tiryimyim@gmail.com

TAPAK 8

Yangia anidakangma :



Tir Yimyim



tir_yimyim



tir yimyim

TAPAK 7

Miami Open: Korda-i world no.1 Alcaraz tsükdaktsüogo

State affairs tir mapa abentsü Kim Jong Un shimshiogo

VOL. XXIII ISSUE NO. 160 (ADOK 160) DIMAPUR SANGTENNÜ (TUESDAY) METSÜREMI (MARCH) 24, 2026 ₹ 5.00

28-Koridang A/C by-election atema nisung 6-i nominations file süogo



Daochier I Imchen BJP

I Abenjang NPP

T Chalukumba Ao INC

Imtiwapang Ind.

Imchatoba Ind.

Maj. Toshikaba Ind.

Mokokchung, 23rd March (TYO): 28-Koridang Assembly Constituency by-election koba 9th April, 2026 nü agitsüba lir, iba nung tokteptsü asoshi tejangrar candidate par trok (6)-i tenüng agütsüogo.

Itemji; BJP candidate Daochier I. Imchen (Mangmetong), NPP candidate I. Abenjang (Longkhum), Indian National Congress nungi T. Chalukumba Ao (Chungtia), Independent nungi par asem lir - Imtiwapang (Chungtia), Imchatoba Imchen (Mangmetong) aser Maj. Toshikaba (Chungtia).

Election-i aitsüpur tenüng agütsütsü (nomination file asütsü) atema tatembangba anogoji 23rd March, 2026 liasü. Daochier I. Imchen dak alaka tanüngba candidate ajak tesüsabuba anogo nung dang nomination file asü. Metoktepnür atema tenüng agiintsü atema tesüsabuba anogoji 26th March, 2026 agüja lir aser vote-ji 4th May, 2026 nü azüngtsü ECI-i sangdongogo.

28-Koridang kübok yim itemi

lir - Longkhum, Mangmetong, Sattsü, Khensa, Meküli, Chungtia, Aliba & Kinunger, town kübok Yimyu ward aser Longchenkong, Sapangya aser Alichen-a iba constituency nung densemer. Polling station ajak senteper 30 lir.

2003 nung Imkong L. Imchen (Mangmetong) ya iba constituency nungi Independent nungi ir adok aser pa 5 ben tashi medangdangi adoka yimsü süa arur, nübur asoshi tia maka pa 11th November, 2025 nü iba akümlü wadang toktsür aoba ajanga iba by-election ya agitsüsa adok. Pa tesüsabubaji 2023 küm BJP ticket nungi adoka MLA & Advisor inyaka lia akümlü tembang.

Independent candidate Imtiwapang-i tanü pa nomination file sür osangbenertem den jembidang, tang tashibo political party kecha nunga dena mali, saka lanuwa nungi lenmang balala ajanga nübur tenzüka aruogo, anungji, "nübur kü den lir ta ni amanger", ta ashi. Tanü khuret tuluba nung nübur tenzüksü ajemoker asünung,

nüburtemi pa nükjidong angateta pa nem yimli agütsütsü teimla tulu nung tokteper, ta pai ashi.

Koridang ya regional mungjen ka lir, anungji, ibaji angateta constituency sangeri aginüba ama inyaksü merangtsü, ta pai ashi. Tebilemstü aser teinyaksü aika lir, saka nübur tashi aser amalitep nung itemji ajema kümdaktsütsü merangtsü, ta paisa metetdaksü.

Koridang asoshi pa pungmang aika lir aser item nükjidong tejangja bener tejangraba nung tanü pa election nung noktaker, anungji, tangar den lirumedema tejakleni ajungketba den temelenshi bener arutsütsü merangtsü, ta Independent candidate Imchatoba Imchen-i nomination file sür osangbener den jembidang pai metetdaksü.

Election agiba shia Koridang nung ya lendong timtem balala ataloker, iba inyakyim ya yimjung agi melenshinür, anungji, tanba election yabo taoba mapang amato masü tesünep aser yimjung nung nüburtemi pei lenir satoksatoka shimdaksütsü merangtsü aser ibaji kü nükjidong

tulutiba lir, ta NPP candidate I. Abenjang-i metetdaksü.

"Ni nübur meimer aser iba constituency nung temelenshi karbo bener arutsütsü merangtsü, vote ajangzüksü atema masü saka Koridang nübur tejakleni anitsü asoshi ni iba election nung noktaker", ta pai ashi. "NPP nükjidongji Naga nunger asoshi tapet political party ka lir, iyongji ni iba party nungi aitsü mulungtet aser nüburtemi ni shimtsü tamang akar", ta paisa shisem.

"Taoba 2023 election nung 410 vote agi tamakok alu, saka iba by-election nungbo takok angutsü imlar, kechiyong nübur kü den lir ta ni amanger", ta Independent candidate army retired Maj. Toshikaba-i metetdaksü. Pa MLA ka akümtsübaji pa indang nükjidong tulutiba lir, iba sülenjiang MLA ka teinyaksüji kechi lir, pai constituency sanger asoshi kechi tajungtiba ibaji inyaksü, ta pai ashi.

Tanba by-election ya "free and fair election" ka asütsü ta amanger, kechiyong shinga yim nunga senso candidate mali, aser taoba mapangbo iba constituency

nung election ji merangbong agi dang rara-a aru, saka tanbo "one man, one vote" asütsü imlar, aser nia iba asoshi dang ajungshia arur, ta pai ashi. Ruling ticket bener aruba agi takok angutsü ta mali, lenirji nüburtemi dang shimer, anungji, Koridang sangeri tapet lenir shimtsü ta ni amanger, ta paisa shisem.

Mapa meinyaki rongsen bushiba anendaktsütsü aser meranga inyaksü aser otia/merüka inyakba mapa ajungshitsü merangtsü. Iba den pa adokra kisüng süaka opposition nung mener nübur asoshi ola adoktsü, ta Congress candidate T. Chalukumba Ao-i metetdaksü. "Ni nükjidong ka yur election-i air aser Congress party meimer aika lir, anungji, ni maongka angutsü imlar", ta paisa teimla o ka lemsatep.

"Chalukumba ya tongmelang nisung ka, tasütait aser nübur asoshi kecha marendaki jembiba nübu ka lir, anungji, Koridang sangeri pa nem khen maongka agütsüdagang", ta Lok Sabha MP & NPCC tir, S. Supongmeren Jamir-i pa pusema metetdaksü.

Congress ya Naga nunger atema tapet party ka lir, aser joko tanü nübur tangatetba melenshia aruba asenoki ngudar, tatishitsü agi; MP S. Supongmeren Jamir-i Lok Sabha nung takok anguba ama, Congress candidate Chalukumba nema nüburtemi maongka agüja takok angutsü imlar, ta Congress tanishir aser taoba Raja Sabha MP & MLA, C. Apok Jamir-i metetdaksü.

Dimapur CSOs-i NLTP Act agientsü atema shidi ka zülutsü

Dimapur, March 23, 2026 (TYO): Dimapur nung Nagaland Liquor Total Prohibition (NLTP) Act agienang ta takhangba agütsüba civil society organizations (CSOs)-i Chief Minister dangi shidi ka zülutsü.

Dimapur nung amenoka aliba CSOs külem senden ka amendang iba lemtet agiogo ta Committee for Repeal of NLTP Act secretary Dr. Kahuka Sema-i ashi.

Tanü senden nung adenertemi taruba anogo ishika tsüngda Nagaland Chief Minister den ajuruteptsü aser tezüluba ka agütsütsü bangjemtepo ta pai ashi.

"State sorkari mapa sadema meinyaktetba angateter saka tangatetba ajanga Act agientsü. Committee-i NLTP Act agienaka mesüra magienaka inyaka aotsü sentong renema lir" ta Dr. Kahuka-isa metetdaksü.

Dimapur aser East Dimapur nungi kaketshir teloktem aser village councils dena CSOs den sendentem mena arudang NLTP Act ya tamakok anguba

jangjaogo. Onoki asüngdangyaba telok 80% jungnüa Act ya agientsüla ta mulunga agizükogo ta paisa ashi.

Külen, Dimapur Area Baptist Arogotemi state sorkar dang revenue generation, socio-economic aser health onüktem nung ajemdaker NLTP Act agienba nung lendong keta lir ta metetdaksüogo.

State sorkari NLTP Act mapa inyaka arudang tamakok angubatam takok ngua inyaksü merangtsüla ta parnokki ashi.

Sorkari public health kümszüka ayutsü tebilemstü khuret bena lir aser nübortem ajebba angashitsüla mesüra Arogoi ola adoktsü ta Dimapur Area Baptist Arogotemisa metetdaksüogo.

Arogoi sorkar aser civil societies den külemi yariteptsü renema lir. Asen lima melenshitsü, yanglushitsü aser tasen kümshitsü atema sarasadema aser shinzüka yutsüba ama onoki inyaksü ta Dimapur Area Baptist Arogotemi ashi.

CNFN-i state sorkar dang Naga yimten latettsü ayongzüker

Dimapur, March 23, 2026 (TYO): March 21, 2026 nü Concerned Naga Forum of Nagaland (CNFN) lokti senden amendang state sorkari tenangzüka ana nung ajemdaker Naga yimten latettsü atema ayongzüksü lemtet.

2015 nung NSCN(IM) den Framework Agreement aser 2017 nung WC, NNPGs den Agreed Position nung ajemdaker Naga yimten latettsüla ta CNFN-i ashi.

India sorkari NSCN (IM) den olemtep tenzüker küm 29 süia arur. Taoba Nagaland Governor aser India sorkari shimtetba tatembangba interlocutor R.N. Ravi-i October 31, 2019 nü olemtep ajunga tembangogo ta Nagaland Legislative Assembly nung sangoktsüba sülen küm 6 süia arur ta parnokki ashi.

Ajisüaka, iba onük ya assembly nung benoka mejembir aser Political Affairs Committee-i tawa olemtep 'political level' nung ajungkettsü ta ashibaji

olemtep manentsü atema tasa ka dang lir. Iba tangatetba ajanga India sorkar aser Naga nunger asoshi olemteperem tsüngda tenangzüka ana ajembanger. Iba inyakyim ya tashi maneni benshitsü mesüra Naga yimten tebilemstü asoshi lemtet ka magidaktsütsü atema lir ta CNFN-isa ashi.

India sorkar den tenangzüktep ana sign asüba sülen telungpur telok aika razüka ogo aser tang 30 tema kümogo. Telungpur telok teimba akümba ajanga Nagaland nung alitem dak ozüng alema inyaksangshiba teimba kümogo. Naga yimten melatetba den olemtep metembangba agi meibanger 'syndicate systems' aser 'percentage cut' inyakyimtem tenzüko. Iba ajanga Mafia maparen aser ozüng alema tax saruba ajanga Nagaland nung kecha masüba nisungtem timtemdaksür ta CNFN-isa ashi.

Arunachal Pradesh, Meghalaya, Mizoram, Assam

state tem Putu 21 den liromedema tejakleni aoer saka külen Nagaland nungbo nübortem okronger, timtemer, temeten mangur, ochimashi aser rongsenkettsüng khuret agi anener ta parnokki metetdaksü.

Anungji Nagaland nung opposition maliba sorkar mejanga aliba nungi saksüla aser teyariteper ka ama inyaksüla. Nagaland sorkari nübortem asoshi lendong bentsür aruba maparen meinyaksüla saka facilitator ka akümtsü mepishir ta CNFN-isa metetdaksüogo.

Nagaland sorkari nübortem adokba ola angashitsüla aser political agreements ana yagi lemtet ka agitsüla. State sorkari taruba assembly nung bangzüng ka agi agreement ana pusemstüla aser India sorkar dang agreement ana mapa küma inyaka nübortem mapang talangka nungi aginüa aruba ama Naga yimten latettsü ayongzüksüla ta Concerned Naga Forum of Nagaland (CNFN)-isa ashi.

FAC, Mokokchung aser CTC, Aolijen tsüngta MoU zülutep



Dimapur, Metsüremi/March 23 (TYO): Fazl Ali College, Mokokchung aser Clark Theological College, Aolijen, Mokokchung tsüngta Inter-Library Book Loan Initiative asoshi Memorandum of Understanding (MoU) ka March 23, 2026 nü zülutepa liasü.

Iba tezüngzüktep nung Dr. I Wati Imchen, Principal, Fazl Ali College, Mokokchung aser Rev. Dr. A. Temjen Jamir, Principal, Clark Theological College, Aolijen, Mokokchung nati meyongnem agüja liasü.

Vinod Kumar, Vice-Principal (FAC),

Bendangsenla, IQAC Coordinator (FAC) aser kaket reju anaprong nungi librarians aser FAC indang library committee züngsemtem lia iba MoU ya zülutep.

Iba sentong nung Mesutoba, Convenor, Library committee, FAC menden liasü aser kaket reju anaprong nungi principals ajanga o tatsütsü jembidang kaket reju ana tsüngta shisatsü aser resources lensatepba nükjidong lemsatep.

Iba sülen Dr. Lendina, Librarian, FAC aser Jason D A, Librarian, CTC nati pei kaket reju nung facilities

anguba indang lemsatepa liasü. Reju ana kaketnang nung aliba kaket tem amshia kaketshir tem tajangzük tulu alitsü ta parnoki ashi.

Higher education, research aser scholarly collaborations tejakleni anir aotsü mangdang kasa aliba ajiteta iba mera ya agia liasü. Reju ana tsüngta iba MoU zülutepba ya academic cooperation, tekolok shisatsü arenba, aser kaketnang nung aliba resources tajungtiba nung amshia reju anaprong nungi tesayur, researchers aser kaketshirtem ajangzüksü tangatetba nung lir.

Dimapur nung PwDs registration drive agitsü

Dimapur, Metsüremi/March 23 (TYO): DREAM Nagaland lenisüba kübok district tesem ajaklen Persons with Disabilities (PwDs) registration campaign agitsü, ta Deputy Commissioner, Dimapur, Dr. Tinojongshi Chang, NCS-i sangdong ka nung metetdaksüogo.

District tesem ajunga nung employment exchanges nung PwDs tem mapa bushir ama tenüng bendentsü asoshi iba drive ya agir.

Iba registration camps ya Dimapur indang colonies aser wards balala nung anogo aser mapang lemsar agitsü. Anungji Village Councils, ward ketdangsür aser colony lenirtem dang iba inyakyim nung yariteptsü aser iba osang prokshiba nung shilem agitsü totuyuba agütsür, ta ashi.

PwDs tem nem employment opportunities tajungba agütsü mechi employment exchanges

nung parnok tenüng zülüokba nung yariteptsü sorkari inyakba nung iba ya shilem ka lir.

Registration atema eligibility criteria ya arishi küm 14 aser 37 tsüngta alirtem atema asitsü.

Applicants temi disability certificate aser Aadhaar card (Xerox copies) agütsüsüla.

Supply colony, Fellowship colony, Nepali Basti, Forest colony, Landmark colony nung registration camps ya March 24, 2026 anüngdang 11:00 ako nungi nikongdang 2:00 ako tashi alitsü.

Notun Basti, Riverbelt, LRC, NST colony, Middle point, Khormal Areas nung March 25, 2026 anüngdang 11:00 ako nungi nikongdang 2:00ako tashi alitsü; Lengrijan, IV, Razaphe, Kashiram, Indisen, Firing, Rilan nung March 26, 2026 anüngdang 11:00 ako nungi nikongdang 2:00 tashi alitsü.

Kyung Colony, Sewak, Oriental, Viola nung March 24,

2026 anüngdang 11:00 ako nungi nikongdang 2:00 ako tashi; Signal, Kevijau, Sematilla, Xuvihe, Marwaripatti, Chakhesang Colony, Ghorspatti, Westyard, Thahekha, Dhobinalla nung March 25, 2026 anüngdang 11:00 ako nungi nikongdang 2:00 ako tashi; Bank colony, Walford, Imkonglenden, Circuit House, United colony, Kuda nung March 26, 2026 anüngdag 11:00 ako nungi nikongdang 2:00 ako tashi.

East Dimapur, Veterinary Colony. Burma camp nung March 24-26, 2026 anüngdang 11:00 ako nungi nikongdang 2:00 ako tashi; Deaf Biblical Seminary, Prodigals Home etc nung March 23, 2026 anüngdang 11:00 ako nungi nikongdang 2:00 ako tashi.

Temsüa aliba nisung ajaki iba maongka agia registration drive nung shilem agitsü ayongzük, ta sangdong ajangasa ashi.



World Meteorological Day nüngtem nung March 23, 2026 nü Director, Soil & Water Conservation, Government of Nagaland ajanga "Meteorological Report of Nagaland 2025" booklet ka sayatsüdang tangokba noksa nung angur. Iba sentong ya "Observing Today, Protecting Tomorrow" omen kübok agia liasü

Kohima nung zü agianogo ishika timtemtsü

Kohima, Metsüremi/March 23 (TYO): Jotsoma Reserve Forest area nung mainline raksaba ajanga Kohima municipal jurisdiction nung zü supply agütsüba nung timtem ajurua lir, ta PHED Urban Division, Kohima ajanga nüburtem dang sangdong ka nung metetdaksü.

Er. Ahito Awomi, SDO-I, PHED ajanga sangdong nung ashiba agi, iba timtem ya anogo

ishika alitsü aser Kohima jila ajunga nung zü agütsüba nung kongshitsü.

Tekeratiba nung akhi ama zü agütsütsü asoshi yanglushiba maparen tenzükogo, anungji nüburtemi khen atema timtem arema atatsü mepishir, ta ashi.

Akok tashi tekeratiba nung raksar aliba yanglushiba maparen tembanga zü shidak agütsütsü asoshi mera balala ashiba agi, iba timtem ya anogo

Kohima nung aonung traffic tenokdangba agütsür

Dimapur, Metsüremi/March 23 (TYO): Lenmang yanglushitsü aliba mechi Razhü Point Junction nungi IGAR (North), D-Block ajanga Phoolbari Junction tashi khen atema aonung traffic mesenzütsü Kohima district administration ajanga tenokdangba agütsüogo.

Deputy Commissioner, Kohima, B. Henok Buchem-i ashiba agi, March 24-26, 2026 anogotem aonung 9:00 ako

nungi anepdang 5: ako tashi iba lenmang nung gari kata mesenzütsü aser lenmang tezülen gari anena ayutsü memelatsü.

North leni aoba gari ya akhi ama NST lenmang leni aotsü. South leni aoba gari tem Khuochiezie Local Ground bypass road ajanga paidoktsü.

Nüburtem dang iba mapang tashi anga amalitep akatsü ayongzük, ta sangdong ajangasa ashi.

DC & DEO Mokokchung-i Chungtia VC den senden amen



Dimapur, Metsüremi/March 23 (TYO): By-Election agitsü aliba dak sendakba nung Chungtia yimdak tensa mejungi akumba asadangsü atema Deputy Commissioner & District Election Officer, Mokokchung, Ajit Kumar Verma, IAS den Senior SP Mokokchung aser administrative ketdangsür temi March 21, 2026 nü Chungtia yimtsüng semdanga liasü.

Iba mapang Deputy

Commissioner-i election dak sendakba ken o balala jembitsü atema Chungtia village council züngsemtem den senden ka amen aser By-Election tesunep nung ochishia agitettsü asoshi stakeholders ajunga nungi amalitep akatsü tongtipang lir ta ashi.

Parnoki yimtsüng kübok polling stations tem semdanga election tajungtiba nung agitettsü asoshi nüngdakba anepalutsütsü aser renemshia aliba asadanga jaja.

IAS Officer Trainees temi NBHM semdang

Dimapur, Metsüremi/March 23 (TYO): Winter study tour nung shilem ka ama 2025 batch IAS Officer Trainees par ter-i March 20, 2026 nü Nagaland Beekeeping and Honey Mission (NBHM), Chümoukedima semdanga liasü.

Iba telok ya Group Leader Ira Jorwal aser Associate Group Leader Neelesh Goyal nati anir aru. Parnoki iba tesem semdangba mapang state nung ninang metsüba temaba jenjangi ajungkettsü atema NBHM-i maparen balala inyakba indang parnok den lemsatepa liasü.

Parnok dang "Bee Ambassadors" ama alitsü aser mojitzü agütsüba ninang nungi tajangzük balala anguba indang awareness prokshitsü ajungshia liasü.

Trainees temi NBHM ketdangsürtem den sensaksemba mapang ninang metsüba yimya balala, talisa production, processing aser marketing indanga asüngdangyaa liasü.

Parnoki Honey Processing Plant semdang, koba tang yangluba mapang lir, aser Honey Hub semdanga yangji Nagaland ninang mojitzü tabu balala sample bendena value-added products balala yua aliba repraanga liasü.

Government of India aser state sorkari nübur ajangzüksü schemes balala inyakba angateta grassroots level nung policy tem mapa kuma inyakba angatettsü nükjidong nung parnoki iba tesem ya semdanga liasü.



March 23, 2026 nü New Delhi nung Delhi LG, Taranjit Singh Sandhu 26buba IndiaSoft expo nung tangokba noksa nung angur. Indiasoft ya India nung IT & Tech Exhibition tulutiba lir.

Tang Middle East tensa ya shisabulutsüsa lir: PM Modi

New Delhi, March 23 (Agencies): Hombarnü Ato kilonser Narendra Modi-i, tang West Asia tensa ya shisabulutsüsa lir; US-Israel aser Iran tsüngda rara ajanga India nung energy security, rongsenkettzüng aser bendanglen aliba sensotem mejungi kongshitsüa akok, ta metetdaksü.

Lok Sabha senden nung jembidang Modi-i, "Tang West Asia nung aliba tensa ya shisabulutsüsa lir. Joko hopta asem dak tali raraba ajanga alima rongsenkettzüng dang masü saka nüburtema kanga mejungi kongshir. Alima kintemi telok ajak dang tekaraba nung iba mangatetep benteta rara anentsü ajungshir," ta metetdaksü.

February 28 nü Israel aser US nati senteper Iran amakba mapang nungi tenzüka tang tashi raradar, aser iba ya ajanga tayimsü service, rong nung khu shibelenba aser gas supplies tsütsü timtem ajangshidar.

Talisa rong senzüba tongti lenmang 'Strait of Hormuz' shibangba ajanga alima nung totzü shilebelenba shilem 20 kongshir.

Ato kilonser-i, "Kibongtemi timtem majurutsü atema sorkari petrol, diesel aser gas supply tsütsü tetsükdaksü majurutsü atema inyakdar," ta metetdaksü. "India nungertemi nüngdakba LPG shilem 60 bo tangalen nungi bener arur, ta asenok ajaki meteta dang lir. Supply tensa koma akümtsüar memetet, ibayongji sorkari domestic supply atema inyaker. Linük nung LPG production-a teimba kümogo," ta pai metetdaksü.

Paisa, "June-July ita nungi

alu nung metsüh atemtsü mapang atonger, ibayongji fertiliser supply onoki renemogo," ta metetdaksü.

"India nung petrol peria rizünga lir; tang reserves nung petrol 5.3 million metric tonnes lir aser maneni 6.5 million metric tonnes rizüngtsü atema inyakdar," ta pai ashi.

"Iba timtem nungi India nung aluyimertem kümzüka lir. Organic aluyimtsü atema onoki ajungshir aser sorkari maneni aluyimertem yaritsü," ta pai ashi.

"Totzü tazü, gas aser fertilisers teimbaka Strait of Hormuz lenmang ajanga India-i bener arur. Totzü, gas aser fertilizer abenba rongtem India tonga arutsü atema India-i Gulf nung rong senzüba lenmangtem mita reprangdar," ta pai metetdaksü.

Urea aser ammonia densema nitrogen fertilisers shilem 63 aser di-ammonium phosphate shilem 32 bo Gulf nung aliba linüktem nungi bener arur. Aluyimba ajanga India nung rongsenkettzüng aintsü atema item fertilizers ya kanga tongtibang.

"Tang tashi nungbo asenok ket nung koila peria rizünga lir, anungji asenoki power supply tsütsü timtem majangshitsü," ta pai metetdaksü.

Yimjung atema India-i meranga inyakdar, ajisüaka commercial rong aser Strait of Hormuz tzüyim lenmang nokdangba yabo magizükteter, ta pai ashi.

Rara tenzüka mapang nungi Strait of Hormuz ajanga rong nung khu bener maruteter, ajisüaka gas aser totzü supplies tsütsü tetsükdaksü majurutsü atema sorkari inyakdar, ta Ato

kilonserisa metetdaksü.

Iba rara ya ajanga meimlaba tayongzükba aika ajangshidar, aser item rongnung rongsenkettzüng aser linük security dak sendakba tayongzükbatem densema lir, ta pai ashi.

"Iba rara ajanga kongshiba linüktem den shishilembaba tsütsü India nung tesendaktep junga lir. Asenoki nüngdakba totzü tazü aser gas shilem tulubaka iba region nungi abener. Iba dak alia iba region nung yimjung alitsüji tongtibang, kechiyong yangji India nung crore 1 dak tali mapa inyaka alir," ta paisa metetdaksü.

Iba rara tenzüka mapang nungi sorkari rara aliba tesemtem nung India nung ajak nem nüngdakba teyari agütsüdar, ta pai metetdaksü.

"Ni West Asia nung aliba linüktem nung tekolakpurtem teimbaka den phone ajanga anaben tashi jembio. Parnok ajaki India nung kümzüksü atema inyaksü, ta nangzükogo," ta paisa metetdaksü.

Ajisüaka tia makai India nung karbo süadokogo aser kar yiruogo, ta paisa shisem.

Lok Sabha nung Ato kilonseri jembiba onük dak sendakba nung tasüngdangba ka langzüdang Congress MP, Priyanka Gandhi Vadra-i, "Pai linük nüburtem nem iba tensa indang metetdaksüogo, saka osang tasen kecha memetetdaksü," ta ashi.

Laisa, "Onoki o lemteptsü atema notice agütsübaji ataloktsüla, ibaji ajanga dang onoki-a telangzüba agütsütettsü aser ajaki pei tebilemba lemsateptettsü. Parliament nung iba onük nung o lemteptsü junger," ta ashi.

2011 Census nung ajemdaker Women's Reservation Act benoktsü

New Delhi, Metsüremi/ March 23 (Agencies): Centre nung BJP-i aniba sorkari 2011 Census nung ajemdaker Women's Reservation Act mapa küma benoktsü atema renemdar, ta osang ka ajanga metetdaksü.

Iba inyakyim kübok tang Lok Sabha nung menden 543 aliba nungi 816 akümtsü aser tetsürtem nem menden 273 shiteta yutsütsü.

Tetsürtem atema reservation ya Census tasenba agiba aser delimitation exercise agiba sülen ang benoktsü lateta liasü, ajisüaka sorkari iba Act ya tekeraba nung benokner.

Iba ozüng yanglushitsü atema tang tagidak budget senden nung Bill ka benoktsü aser Parliament nung tetsürtem atema menden shiteta yutsütsü.

Sorkari opposition party tem danga senden nung iba Bill pusema agizükdaksüner ta mepishio, ta osang angazüker.

Cabinet nung iba Bill ji agizükba sülen taruba hopta Rajya Sabha nung iba bill ji benoktsü, ta sorkar osang ka ajanga metetdaksü.

Women's Reservation Act ya 2023 küm agizüka liasü. Iba

Act kübok Lok Sabha aser state assemblies nung tetsürtem atema menden shilem 33 shiteta yutsütsü, ajisüaka delimitation exercise anendaka aliba ajanga tang tashi nungbo iba ozüng mapa küma mebenok.

Sorkari delimitation exercise magidangyongi iba ozüng ya mapa küma benokdi süra iba ozüng ya tera yanglushitsüsa akümtsü.

Parliament nung iba Act kübok Arrla 5 yanglushitsüsa akümtsü, kechiyong iba Arrla kübok census tasen agia delimitation exercise agiba sülen ang mapa küma benoktsü lateta lir.

Iba ozüngji yanglushia agizüktsü atema two-thirds majority nüngdaker. Tang Lok Sabha nung BJP MP 240 aser Rajya Sabha nung BJP MP 103 dang lir, anungji two-thirds majority atema sorkari opposition party tem teyari nüngdaksü.

Taoba hopta Congress Tir Mallikarjun Kharge-i Parliamentary Affairs Minister, Kiren Rijiju dang Women's Reservation Act atema o lemteptsü asoshi party ajak senden ka ayongzüktsü nüngdak, ta metetdakja liasü.



March 23, 2026 nü Prayagraj nung Martyr's Day anogomong nung nisungtemi linük nüchiso atema rarartem- Bhagat Singh, Sukhdev Thapar aser Shivaram Rajguru nem tetushi agütsüba noksa nung angur.

Tamil Nadu nung AIADMK-i BJP, PMK, AMMK nem menden 56 lemezüktsü

Chennai, March 23 (Agencies): Tamil Nadu nung AIADMK-i aniba NDA teloktep nung party tem tsüngda assembly election atema menden lemsaogo.

Tamil Nadu nung April 23 nü assembly election agitsü.

AIADMK-i BJP nem menden 27 lemezüktsü, PMK nem menden 18 aser AMMK nem menden 11 lemezüktsüogo (ajak senteper 56).

Chennai nung party headquarters nung osangbenertem den jembidang AIADMK general secretary, Edappadi K Palaniswami-i iba osangji metetdaksü.

Iba teloktep nung aliba party tem atema lemezüktsüba constituencies ji kobi melii sangdongtsü, ta pai

metetdaksü. NDA teloktep nungsa taoba mapang Union minister GK Vasan-i aniba Tamil Maanila Congress (Moopanar) aser IJK densema lir.

AIADMK-i menden kwi nung tokteptsü?, ta asüngdangba langzüdang Palaniswami-i, party kar den tang tejembidak, iba sülen ang onoki iba osangji tejangja metetdaksütsü, ta ashi.

Osangbenertem senden nungji BJP lenir Piyush Goyal, PMK tongti Anbumani Ramadoss aser AMMK tongti TTV Dhinakaran nungera liasü.

Paisa, taruba assembly election nung NDA-i menden 234 nungi menden 210 nungbosa takok ngua sorkar akümtsü, ta metetdaksü.



March 23, 2026 nü Patna nung aliba bazar ka nung nisungtemi 'Chaiti Chhath' benjung atema renemshia somomo alidang tangokba noksa nung angur.



TIR YIMYIM YIMOBILEM (EDITRIAL)

DIMAPUR TUESDAY, FEBRUARY (METSUREMI) 24, 2026

Nübortem candidate !

Tang by-election agitsü aliba Koridang Assembly Constituency ya Ao kin asoshi dang masü saka Naga nunger ajak asoshi nükrangdong tesem aser mapa ka kümogo, kechiyong Nagaland nung assembly constituency 60 rongnung Koridang ya Naga yimten temeten asoshi kanga raa nokdakba nübortem alidak tesem ka lir. Aji oda, Naga yimten nüchiso asoshi noktakba tongpang rara nunga Koridang nung alirtemi ajuruba timtem tekangshi amabo Naga lima tesem aika nung ajudanga malitsü. Ibayongji, India temzüng kübok election agiyonga, yimten mapasa asünungji, Koridang constituency nung agiba election mapangbo Naga yimten temeten atsünga ken o jembia election agir. Aji oda, tang by-election nung toktepertem rongnunga kasa tangatetba nung Naga yimten ken o jembia aser nübortem asoshi inyaktsütsü terenlok len tajung sayua tokteptsü imlar. Asenok ajak asoshi tekümdangtsü kaji, tang yabo constituency ka nung dang election agir, anungji tanünga constituency purtem ajaki Koridang nung election agiba ya 'World cup match' tajung ka asayaba reprangtsü atar ama yongyasete atar. Ibaji Koridang asoshi jangratemtsüka saka ano tekümdangtsü kanga tulu lir. Aji oda, jungjunga bilemdangra, nübortem madak yimsü asütsü asoshi yimsüsür shimtsü atema nübortem nem temeten aser tashi agütsüba ya tepelatsü tulu lir. Ibayongji, election agiba ya nübortem nem agütsüba yimten temeten madak pelatempa shilem agiba " Festival of Democracy" anogo ka lir ta angateta senso ajaki shilem agitsü meranger. Iba temeten aser maangka ya kodang angatetdir, nisung shiai pei vote-ji sentia ta angatetsü aser kodang pei vote ya sentia ta angatetdir, ibaji shingaia mayoktsü aser shingaia alitsüa makoktsü. Kasaji, kodang nisung shiai pei vote jenjangji angatetdir, pei vote peisasa enoktsü asoshi anogo piyong nokdakyonga arema nokdaktsü. Iba tangatetba nung, tang Koridang nungi tenzüker asenok Ao lima tesem ajaklen election mapang yimtsüng ka kija meyong senso candidate masü saka constituency ajak meyong nübortem candidate kümer, candidate ajak sabang ka nung jaoka pei nübortem dang pei tangatetba aser pei tebilemba shidaktsütsüsa lokti aser arogo telungjem tentetemi arok sabang kati jaoka sentong ka agitsüla. Iba jagi election junga agitsüba nung tuluka yaritsü. Aji oda, yimtsüng ajaki candidate ajak otettsüla aser pei tebilemba lemsateptettsüla. Joko, akhi ama election mapang candidate-temia nübortem bushia mao aser nübortemia pei candidate-a mangu ta ser kidang nungi dang senotsü yoka lemdaktsüba aser kidang mena yur kinunger ajak senyong aser mapa yong ayokba alartem sobaliba tamajungtem to endoktsüla. Tesasatsüka, tamalen aiben asenok nübortemibo candidate-a mangu aser candidate-ia asenok memetet ser asenokbo azü poka long agi ontep, süng agi züktep aser injang-bomb-a amshia raratepba tensa tia tamajung ajuruogo. Iba election süir külenbo asenok ontepba, züktepba aser katempa raratepba tetezü to kecha mali, amajok nung tazüngla ka atema nisungtem den tamajung agitepba mapa ka dang kumadokba asenoki meteter. Itemji kodang asenoki bilemdangdir, sen teraka atema, mapa tilaka atema aser gari secondhand ka atema asenokbo tasüa majem tsükchir tesashi den rarar ama pei kinunger, pei medemer aser pei yimtsür yimertem den raratepba mapa to agi asenok ya nüchi masü tamachia ta sayur. Aji oda, tang ya asenoki asenoksasa asenok election mapang senso candidate shima yur, Tsüngrema mali ama tashiyim mapa tamajung inyakbatem ajak to langa asenoka azükarua lidar na (?) ta bilemdangtsüba mapang tajung ka asütsü. Asenoki election mapang senso candidate shimba agi asenoksasa asenok senso masü alar danga teküpbokba jenjangi luadokogo. Aji oda, asenok nüchi kuma arutsü asoshi asenok candidate-ji nübortem candidate asütsüla aser nübortem ajaki pei angatetba nung sademsadema tetsübu aser tarendak melii election nung shilem agia pei vote peisasa enoktsü mulungtettsüla. Pei vote ya atamata masü, idakji asen taküm, asen kibong aser asen lima yanglushitsü tashi tulu keta lir. Iba tangatetba nung Koridang nungi tenzüker asen lima nung election junga agitsü asenok ajaki mulungtetdi.

OLEMSABANG

INDIA LIMA YA HINDU LIMA AKÜMETSÜ MERANGER ASÜ ?

~ L. Kika Pongener.

Tawa tanü India lima nung Official Functions aser Educational Institutions ajunga nung; National Song 'Vande Mataram' ken atentsüla ta temzüng-ozüng ka ama benshitsü Sorkar nungi tetuyuba agutsüba osang angazüka India lima State kar nungpo iba anema ola atokba angazüker. Iba onuk dak sentakba nung Nagaland Legislative Assembly senden nunga tatartem kanga sashia olemtepba angazükogo. Ano Naga Students Federation-i anir kaketshirtem aser mulungtet telok, nubur temulungertemi iba anema Kohima nung 'Mass Rally' ka ayungzükogo. Mapang shia India lima ajunga nung tasa balala agi mesuzüka; Hindu yimsu benshidaktsütsüba sentong tapu-tapu atongba ajangshia arur. Ano India lima nung tang küm ishika tsüngda nung inyakyim aika nung; Hindu yimsu tashi aittsüba aser renloktsüba tsütsü atsünga inyaksangshiba angur; aser aiben tanga tamangba yimsu amangertem muslim, Sikh, Christian aser minorities telok dak tashiyim amshia tim masüba mapatem jakdak-jakdaka inyakba ajangshia arur.

Küm ishika sua ogo, 'Yoga' ya ajaki sapua benshidaktsütsü tasa balala agi mesuzüka sentong atongba-a denjia aruogo. Asenoki 'Yoga' indang teraji bushidangra; Yoga ya 'Exercise' ka dang masü; saka iba ya meditation lir. Kodang 'meditation' ta sudir aji 'devotion' den sendaktepa lir. Anungji iba Yoga ya Hindu nunger tekülemba nung shilem ka asütsü sudi. Ano mapang tatsüka suiogo; School Text Book ka Supreme Court-i nokdangba-a Social Media nung nguogo. Ashiko, iba Text Book nungji tashishitsü aketba kar densema alitsü sudi. Ano tang India lima ajunga nung Official Functions aser Institutions ajak nung 'Vande Mataram' ken ya Function aser class medenzükdang 'Compulsory' tendaktsütsüba sentong atongba angazüker. Asenoki iba 'Vande Mataram' ken teraji bushidangra; iba ken ya Hindu nunger tekülem ken (Devotional Song) ta ashitsü akok.. Ano küm ishika suiogo; India lima nung School, College, Institution kar nung kaketshir kar nem 'Hi Ram' aser 'Bharat Mata-ki-Jai' ta khangshia shitaktsüba aser shirnoki meshilir School, College, Institution nungi aritoktsü aser mezüngdaktsütsü ta amokmerena merenshiba-a angazüka aruogo. Item ajakji jungjunga shisadangra Hindu tamangba yimsu dak sendakba mapatem aser o-tem lir.

Tesasatsüka, asenok kanga kümdanga meita alitsü melena, asen Naga nunger khristantem-iang asen sasa Hindu yimsu-yimpong sulen anidaka benshitsü merangba, tesuiba mapang aiben dang atalokba ajangshia aruogo. Küm ishika suiogo...India lima nung Politician ka asüba temang arongba mittsü (Ash) asen Naga limai lemsüka bener aruba; Hindu nunger 'Rakhi Bandan' benjong mapang Army Personel kar dak 'Rakhi' mesuloktsüba; Hindu nunger Diwali benjong nung rong teploka asayaba; Hindu nunger 'Durga Puja' benjong nung par tsüngrem tzü nung endoktsüba ayongi bener aodang parnok den tsüngsanga anidakba; iba amala mapatem asen Naga nunger khristantemi benshiba ajangshia aruogo. Asen Naga nunger yagi kecha meshisadangi aiben tangar sulen anidaker. Talisa, asen Ao kin Naga nunger rongnung mezüng khristan yimsu agizüker kin, kechisarena ajak nung tangar dang lesson tajung sayur asütsüla.

Aji oda, India lima ya Hindu lima ka akümtsü meranger asü (?) ta temulungjang nung aiben asüngdang (?) Mapang shia tang amai sorkar tashi nung tasa balala agi India lima ajunga nung Hindu yimsu-yimpong benshidaktsütsü sentong atongba angur. Aji oda, Hindu nunger temeja alidakbo kecha masü; saka India lima ya Hindu nunger kisung masü tanga yimsu amanger aika meyoktepa aliba lima ka asünung; State ajak nungpo khangshia Hindu yimsu-yimpong benshidaktsütsü memerangtsüla. Asen Naga nungeri sen kanga meimerji 'SEN' ammer tasa tapu balala agi mesuzüka arutsü akok. Anungji yimsusurtemi anir nutsüng-nubur tulu-tila ajaki; iba ama temesukba nungji malangtsü asoshi kanga saksalema aser chirapera-a alitsüla. Asen Naga nungerbo kanga tajung kaji...Nagaland Legislative Assembly nung tatartem ajak Christian dang lir. Anungji mapang shia iba ama temesuzükba mapa tapu-tapu arudang, yimsusurtem kenbang-opang ka ser longjemmer nokdaktsüla. Talisa, asen Aor yimsusurtemi tangar dang lesson tajung sayutsüla.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Küm 1,800 tejen osangtajung ken ka Chris Tomlin-i yanglushi



Chris Tomlin

March 23, 2026: Grammy award angur Khristan kentener, Chris Tomlin-i osangtajung kentem kanga meimer; par medemer kati küm 1,800 tejen osangtajung ken ka yanglushitsü atema pa dang asüngdangba ama pai melungsoa agizüka liasü.

Iba kenji küm 100 tejaklen Egypt nung nguteta liasü, saka tawa ang Chris Tomlin aser Ben Fielding nati iba kenji yanglushia sayaogo.

Aso 3buba A.D nung mejemba kenji Khristan ken rongnung ken tejentiba lir. Iba kenjang aser kensü napronglaji kanga junga dang liasü.

'The First Hymn' film nung iba kenji lisem lima nung aliba aser tawa ngutetba indang shia lir. Iba ken ya akhidang Arogo nung züngsemtemi tena liasü.

Iba film ya March 24 aser March 26 anogotem nung theatres nung sayatsü.

Osangbener den jembidang Chris Tomlin-i, "Iba ya ni asoshi tetsübutüsü ka liasü; khuret tulu liasü," ta metetdaksü.

Iba film project ya Australia nung puti otsü nung mongin John Dickson-i apiteta liasü aser iba ken yanglushitsü atema pai Fielding aser Tomlin na nem nunglokja liasü.

Tomlin-i, "Nai iba kensü metettsü nüngdak- iba ya asenok atema bendanger ama lir, saka akhidang iba kensü ya tajung liasü. Akhidang iba ken ya 'pop melody' ama ali asütsüa akok. Akhidang iba ken kanga bulua tenteper asütsüa akok," ta ashi.

Iba ken ya Tebu, Techir aser Tanela Temeshi indang

lir. Yisu Khrista asüba aser tasü nungi shia aruba sülen iba ken ya küm 200 shi tenner alitsüa akok ta bilemer.

Tomlin aser Fielding nati iba kensü junga yanglutsü atema Tsüngrem dang teyari meshia sarasadema liasü. Tenatisa tanü-asüng ken ama yanglushi aser kenjang kar bendenloka liasü.

Ken tejenba jenjang nung yamai zülua lir, "Asenok ajaki oka madoki lidi: Asenoki Tebu, Techir aser Tanela Temeshi matsüngdang osangtajung ken atandang sentsüprang petinutemi ola madok, ayongtem ajak süngjem, tashi alirtem ajaki 'Amen, Amen' ta langzü. Tashi, tenüngsang aser sentsüwangshiji teti asen Tsüngrem meyong asütsü, sempet tajung agütsüsang. Amen. Amen."

Kerala nung Khristantemi party tem nem takhangba kar agütsü

March 23, 2026: Kobi melii assembly election agitsü aliba Kerala state nung Khristan telok kati yimtenren party tem dang sensaker Khristantem taküm jenjang ajungkettsütsü atema state panel kati benokba onüktem mapa kuma inyakang, ta takhangba agütsü.

Latin-rite Catholic lenirtemi, diocese 12 nung nisung million 1.5-i, parnoki akhangba ataloktsütsü ta nangzükba party tem yaritsüa akok, ta metetdaksü.

April 9 nü assembly menden 140 atema election agitsü.

Kerala Regional Latin Catholic Council nung tatong tir, Joseph Jude-i, "Yimtenren tsütsü onok tiyongsü nung dang alir, ajisüaka election manifesto nung onoki akhangba nangzükba party tem dang onoki yaritsü," ta metetdaksü.

March 19 nü osangbener den jembidang Jude-i, "Hopta ka tejaklen onoki takhangba onüktemji yimtenren party ajak nem email ajanga

metetdaksüogo. Ajisüaka tang tashi nungbo shiangia telangzüba magütsü. Candidates shimba maparen nung parnok kanga mazüngi alitsüa akok," ta metetdaksü.

2021 küm communist-i aniba teloktep Left Democratic Front (LDF) sorkari retired justice J. B. Koshy leniba nung commission ka tentetja state nung Khristantem loktiliba-rongsenkettzüng jenjang asadangtsü atema mapa nunglokja liasü.

Ajioda 2023 küm May ita nung commission jagi sorkar nem parnoki bushitetba report agütsü. Ajisüaka sorkari report ji nüburtem matsüngdang mesangdong.

Kaket tapak 357 nung aliba report nungji sensaker Khristantem nem shisaliok aser mapa agütsüba den külemi Khristantem libaliro ajungkettsütsü atema tebilemba onük aika metetdakja lir.

Kerala nung Khristantem rongnung teküboktiba jenjang nung alirtemji Latin Catholics

lir, iba dak alia Dalit aser tribal Khristantema timtema alir, ta report nungji shia lir.

Jude-i, "Onoki langka tasen takhangba agütsür masü. Shirnoki takok ngua May ita nung sorkar tentetdir tentetaka parnok nem state commission-i benokba onüktemji mapa kuma inyakdaksüner," ta metetdaksü.

Jude-isa, commission jagi sensaker Khristantem nem mapa, shisaliok aser healthcare services agütsüsüla ta benoka lir, ta metetdaksü.

Kerala assembly election nung ruling LDF, Congress-i aniba United Democratic Front (UDF) teloktep aser Bharatiya Janata Party (BJP) tsüngda tokteptsü.

Kerala nung Catholic Church nung rites asem lir aser itemji Latin rite, Churches of Syro-Malabar aser Churches of Syro-Malankara lir.

Aso 16buba mapang nung Portuguese nung Kerala-i aruba sülen Latin rite tenzüka liasü.

ANOGO ABEN TSÜNGREM DEN

Kü Timtem Bilemtettang

(T.Ken 119:153-160)

Nisung shingaia o bendangdaki mouner, kuli asütsü mouner. Tai aketerji koda balaka tamajungba! Saka na tetendangba nung noktakra, na asoshi bilemetsür ka lir meteta alitsü junger. Ken züluri Kibuba den jembibaji ibai lir, "Kü tepu kümang, aser ni alangzükang: ne tenangzükba ama ni rok a asoa kümdakjangma" (t.154).

Asenok asoshi pukümer tulutibaji Tsüngrem lir. "Tsüngrem asenok den lira, shibai asenok anema arutsü?" (Rom 8:31). Hopta tsüngda asenoki timtem ajanga aotsü akok. Tangari asenok anema tiyazü osang adoktsütsü akok, jangra matemtsü tia ajurutsü akok, kechiaser asenok anemer lir. Ken ken tangari asenok mangatetba ajanga asenok anema jembitsür. Item ajakji nai tanü ajanga aotsü akok saka ne tetendangba mapang ne den Tsüngrem lir. Kodang na aser ni atitangdir, Pai bilemdanger aser asenok pu akümer.

Pai mangatettepji bentettsür. Kodang asenoki Tsüngrem dang sarasademdir aser shidir, "Kü ken o bilemdangang," Pai mapa inyaker. Pai asenok alangzükang aser kümzükang. Asenok aibelen mesüdaksür aser tepuokdak meyutsür. Tsüngremi Pa nübur taküm timtem nungi kümzükang.

Asenok teimla samadang Tsüngremi yarir. Nai timtem ajurudang, na teimla makai akümstsü akok. Saka Tsüngremi na teyimla makaba jenjang nungi ajungketer aser Pai tashi agütsür.

Tanü kotak nung Yisui na asoshi mepishitsür. Pa ji ne kotaker Temepishitsür aser ne Temaba Putir lir. Na tatidang aser temenen nungi jenbutüsü asoshi pai ne nem taochi agütsür. Saka nai temenen menara ne temepishitsür dangi nai aotsü akok. Pai ne dang tai atoktsü, merüktettsütsü aser ne ken-o nung ne pu akümstsü.

Kodang tangari na timtemdaktsüdir, Tsüngremi amshidakjang. Pai na kümzüktsü aser na teimla makaba nungi temaleni ajungkettsü. Yisui na atema mepishitsütsü aser teibui tai atoktsü.

Chicago nung lenmang nung sayutsüngirtem apuba anema ken o benok

March 23, 2026: Chicago nung lenmang nung sayutsüngirtem ajartem apubaji temzüng anema lir, aser yimsü temeden anema inyakba lir, ta shia sayutsüngirtemi Chicago nung ketdangsertem anema ken o benokogo.

American Center for Law & Justice-i, Millennium Park anasa moapu nung sayutsüngir nisung asem temeden anema yimti nung ketdangsertem inyakogo, ta metetdaksü.

ACLJ-i Brett Raio den Reetik aser Perez nung chiocksü atema takhangba agütsü.

Millennium Park anasa moapu nung sayutsüngiba mapang nung Raio apu; video kuli ka agütsüba sülen pa anema ken o angadangtsü alibaji agiena liasü.

Pa anema ken o agienba sülen Chicago-i kasa tesem nungjisa Khristan sayutsüngir

ana- Reetik aser Perez na apu. Sound system (microphone) amshir sayutsüngirtem aputsü atema inyakyim ka lir, ta ketdangsertem metetdaksü.

Atangji nungbo Chicago ozüng kübok, süklep 100 adener ola ajanga timtem agütsüsa asü nung ang temelaba meshitsü nüngdaker, ta shia ACLJ-i, sayutsüngirtem jagi ozüng alema inyak asü meinyakar mejangjai police-i sayutsüngirtemji apu, ta ashi.

Police iba tesem jagi aruba sülen sound level masadangi dang sayutsüngirtemji apu, ta temepishiba ken o nungji shia lir.

Parnokisa, police-i tashiyim amshibaji Khristan osang proker sayutsüngirtem anema inyakba lir, aser ibaji First Amendment kübok inyakba lir, ta metetdaksü.

Reetik aser Perez na apuba sülen tenaprong ghonda 7 dak tali jail nung puoka liasü.

AO OSHI ANGAZÜKDAK:

TANÜ ANGAZÜKTSÜBA OJANG



Walokwaten

(adj) kiojen tasen meshiteta külemba (sanctification of a place)

* Limapurtemi walokwaten ser külenang ki tasen nung alir.

Walu

(n) nisung aika, telok tulu (multitude)

* Yisu sülen anogo shia nisung walu küma anidak.

OLONG PAITEP # 7453

Grid for OLONG PAITEP # 7453 with numbers 1-16 in various cells.

TIPIEN

- 2. Auonung chiyongtsü asenba
5. Mangyimba mapang
7. Otamendakdak
8. Peidak malangba
10. Juli
12. Sen ayudak
14. Tenük agi ajitet
15. Tamajung aküm
16. Apuso

LANGTSÜNGLEN

- 1. Lenmang
2. Aor kidong ka tenüing
3. Tenarong maten
4. A___g
6. Mopung apodoka
9. Tongtipang tagitsü
10. Menungra bilem
11. Aiür
13. S___k
14. T___r

OLONG PAITEP # 7452 TELANGZÜBA

TIPIEN :

- 1. Yiar, 3. Tesola, 7. Yimra,
8. Tangar, 9. Peria, 10. Tanur,
11. Tasen, 13. Lemjem, 15. Tambu,
16. Khuret, 17. Sang.

LANGTSÜNGLEN :

- 1. Yimti, 2. Amen, 4. Shiner,
5. Alaka, 6. Satan, 9. Putet,
10. Tembar, 11. Tatok, 12. Amang,
14. Jala.

NAI-A YA METETTER



March 22, 2026 nü Kai Tak Sports Park nung concert ka nung musicians 1,200 temai "largest reed ensemble" atema Guinness World Record ka yangluogo.

Hong Kong Chinese Orchestra indang International Sheng and Reeds Festival nung "Endless Sheng, Thousand Reeds in Harmony" marathon agia liasü aser parnoki traditional Chinese free-reed instrument amshi.

Army-i Tuting Monastery nung outreach programme ka agi



Itanagar, March 23, 2026 (Agencies): Indian Army-i Tuting Monastery nung special outreach programme ka ayongzüka agiogo aser iba ya civil-military relations tashi itshtisü nükjidong nung liasü. Tuting Monastery ya Arunachal Pradesh kübok Upper Siang district nung lir aser March 20 nü International Day of

Happiness nungtem nung sentong ayongzüka agi. Iba sentong nung Tuting Monastery nungi monk 83 aden. Iba sentong ya yimjung, kati ka angatetsü aser Army personnel o nübortem tsüingda tesentaktep akangshitsü atema agi ta defence sangdong ka nung metetdaksü. Sentong nung traditional

prayer ceremony ka agi aser iba sülen fun games aser Buddhism-themed quiz amala interactive activities agia liasü ta defence sangdong nungsa ashi. Iba sentong ajanga sepaitem aser monastery nung alirtem tsüingda sensaksemstü maongka angu aser kati ka dak temulung alemstü aser amaliteptsü angazükogo ta parnokisa ashi.

Assam, West Bengal election atema TSR mapa lemozüksür

Agartala, March 23, 2026 (Agencies): Assam aser West Bengal nung election duties atema Tripura State Rifles (TSR) personnel 800 shi mapa lemozüksütsü. Züingsem 294 agi akümba West Bengal Legislative Assembly atema election shilem ana lemsar agitsü. Mezüingbuba shilemji menden 152 atema April 23 nü aser tanabubaji menden 142 atema April 29 nü agitsü. Külen, züingsem 126 agi akümba Assam Legislative Assembly atema election April 9

nü agitsü. Ministry of Home Affairs (MHA)-i mepishiba sülen Tripura State Rifles (TSR) mapa lemozüksü ta Tripura Police ketdangsur kati ashi. "Onoki Tripura State Rifles company 10 shi yoktsü. Parnokji mezüing Assam nung aser iba sülen West Bengal-i yoktsü" ta ketdangsur i ashi. Iba telok nung ad hoc battalion nungi jawan 800 shi adentsü aser 9th Battalion Commandant Amarjit Debbarma, IPS aser 8th Battalion Commanding Officer Alak

Bhattacharya na lenisüba kübok asütsü. Tripura State Rifles ya 1980s nung telungpur khuret azüoktsü atema Central Paramilitary Forces mesüka tentetba lir. Iba sülen Tripura Legislative Assembly-i Tripura State Rifles Act, 1983 yanglu aser iba kübok March 12, 1984 nung TSR 1st Battalion tentet. Kümtem süia arudang battalions talila tenteta ao aser tang TSR battalions aji agi 12 lir, iba nung India Reserve (IR) battalions 9 densema lir.

CM Lalduhoma-i rongsen aika bendener: Mizoram Youth Congress

Aizawl, March 23, 2026 (Agencies): Chief Minister Lalduhoma-i state nung terenlok mapa inyakba tesemtem nung ali alizükba ajanga rongsen aika bendener ta Mizoram Youth Congress-i tai tongloksüogo. "CM Lalduhoma-i Vantawng Falls viewpoint aser Serchhip district nung Kanhmun South area nung ali tululu alizükogo. Lalduhoma-i pa ya tongmelang nisung ka ama sayur saka pai Chief Minister inyakba sülen taoba chief minister inyakertem

den rongsen talila bendener" ta Mizoram Youth Congress president Laltawnliana-i ashi. "2024 tetenzülen Chief Minister-i Vantawng Falls anasa Buangpui area nung kibur pungu dang nungi ali acre 25 nungi 30 shi alizüka liasü. Development of Iconic Tourist Centres to Global Scale scheme kübok pai ali temenok Rs 34.50 crore agütsütsü aliba nungi pai sen angutsü mechi nung iba ya inyak" ta Laltawnliana-i ashi. Lalduhoma-isa Kanhmun

South area nung kibur pezü dang nungi ali alizükogo. Iba ali ya Thenzawl Peace City project nung dena lir ta Laltawnliana-isa shisem. Iba ya private investments masü saka multi-crore government infrastructure projects nungi tajanzük angutsü atema lir. Item ali ya terenlok mapatong inyaksü aliba government department ka nem ketdangutsü atema agütsütsü sentongtem lir, ta Youth Congress lennirisa ashi.



Arunachal Pradesh nung Cultural Heritage Day and Awards Night agidang tangokba noksa ka angur. Interior Park nung anogo tinü benjungmung nung runway shows, exhibitions aser live performances aliba sülen iba sentong agidang 2026 modelling titles aser excellence in design & weaving sempettem agüja liasü. Iba benjung nung handloom collections, jewellery, home décor aser furniture tongti süa sayua liasü.

NY nung tayimtsü ka fire truck den tsüktep; pilot anaprongla asü



New York, Metsüremi/March 23 (Agencies): Air Canada Express tayimtsü ka Deobar aonung menor New York kübok LaGuardia airport nung anenba mapang fire truck ka den tsüktepba sülen pilot anaprongla asü aser aika yirua liasü. Iba sülen airport shibanga liasü, ta ketdangsürtemi metetdaksü.

Air Canada Express CRJ-900 tayimtsü, koba regional partner Jazz Aviation-i achayanger, iba tayimtsü nung passenger 72, crew pezü mener Montreal, Canada nung aru, ta Port Authority of New York & New Jersey executive director Kathryn Garcia-i ashi. Jazz ya Chorus Aviation meyong lir.

Garcia-i ashiba agi yirur alir 41 rongnungi 32 mozüki nungi yokogo saka nisung teku kanga mejungi yirur maneni mozükidang temang anepaludar. Yirur alirtem rongnung passenger, tayimtsü crew aser fire truck nung mena aliba officer ana densema lir. Fire truck nung

mena aliba officer anaprongla ya kanga mejungi yirur lir.

Garcia-i ashiba agi, United Airlines tayimtsü ka nung teshinem menemba osang agütsüba sülen iba fire truck ya oya aliba mapang iba lendong atalok.

Minute ishika tejakdang LiveATC.net nungi air traffic control (ATC) audio ajanga United Airlines tayimtsü ka nung teshinem ka menemba ajanga emergency ka sangdonger liasü. Controller temi crew dang fire truck tem tonga aruogo ta metetdaksü.

Iba sülen ano fire truck ka Runway 4 ajanga aotsü asoshi temelaba agütsü, kong iba truck ya tayimtsü den tsüktepa liasü.

Mapang tatsüka dang lir ATC audio ajanga controller kati truck 1 dang anentsü asoshi lephia ashiba angashiogo.

Iba tayimtsü yagi fire truck dak ya 24 miles per hour (39 kph) nung atsük, ta flight tracking website Flightradar24 ajanga sayuogo.

Reuters-i lemsatepba noksa ajanga tayimtsü ya tejaklen raksar anüngleni akaketa tur aliba sayuogo.

Air Canada-i ashiba agi, parnoki iba tatalokba indang jangja lir. Jazz-ia tayimtsü aser fire truck tsüktepba osang jangjatsüogo aser mapang tatsüka lir osang tejangja agütsüta shiogo.

U.S. National Transportation Safety Board (NTSB)-i ashiba agi, ken o bushisüngdangtsü atema parnoki technical expert team ka yokogo aser kasa mapang U.S. Federal Aviation Administration (FAA)-i ashiba agi airport ya Hombarnü 2 ako tashi shibanga ayutsü.

Hombarnü osang agütsüba mapang tashi nung tayimtsü 537 thitsür liasü, ta tracking website FlightAware-i metetdaksü.

LaGuardia yagi 2025 küm passenger million 30 dak tema tenzükogo. U.S. airlines aika iba airport ajanga inyaksangshir.

Telangzüba agütsütsü tetsübo agi US temulung meyiper: Iran

Tehran, Metsüremi/March 23 (Agencies): US Tir Donald Trump-i anogo pongu atema Iran indang energy sector amakba soita atatsü, ta sangdonger ghonda ishika lir Iran-i telangzüba agütsütsü tetsübo nung temulung meyiper, ta Tehran-i ashi.

Trump-i Hombarnü Truth Social nung, "Middle East nung mangatettep adoka aliba dak sendakba nung United States of America aser Iran linük tsünga tesüba anogo ana kanga junga sensaksem kaogo," ta ashi.

"Item temulung taroktiba nungi tejangja aser tagitsü sensaksemba olasü nung ajemdaker, koba hopta tepiyong maneni alitsü, ni Department of War dang Iranian power plants aser energy infrastructure nung mitkari amaksü aliba anogo pongu thimentsü totuyuba agütsüogo, koba tang senden

amenba tem aser jembishinü akaba nung takok anguba dak keta lir," ta pai ashi.

US tiri Tehran dang alima nung totzü aser gas asoshi tzüyim nung tongtipang lenmang, Strait of Hormuz tanaben lapoktsü takhangba agütsür anogo ka lir paisa iba sangdonger ya agüja liasü.

Kasa mapang Iran indang state media ajanga post ka X nung lemsatepba nung, "Iran-i telangzüba agütsütsü tetsübo nung Trump-i ghonda 48 ultimatum agütsüba nungi temulung meyiper," ta ashi.

Parnokisa mitkari sangdonger ka taoba mapang agüja aliba lemsatep, kong "US-i Iran indang power plants makra: teraksatsüba meyangu tashi Strait of Hormuz ya shibangtsü aser Iran indang power, energy aser ICT infrastructure nung tenük yoktsü..." ta shia liasü.

Washington den jembishinü akar ta Trump-i jembiba Iran-i magizük. "Tensa tajemba kumdaktsütsü asoshi region nung linüktemi anir inyaker, saka onoki parnok ajak nem telangzüba agütsüba tejangja: iba rara onoki tenzükba masü, aser item ajak Washington dangi yoktsüla," ta foreign ministry ajanga shia liasü.

United States mesüra Israel-i ozü southern tsükumlen mesüra asetkong nung makra, onoki Persian Gulf ajanga nung naval mines ayutsü, ta Iran-i tekumdangtsü shia lir.

Kari danga amak nungbo tongtipang maritime access routes nung mines inoktsü, ta Iran indang Defence Council ajanga ashi. Iba ama mera a nung "established military practice" sülen anidaktsü aser yangji tzükumlen nungi yokba drifting devices densema mines tabu balala alitsü ta ashi.

**Office of the
Khensa Senso Mungdang
SANGDONGER**

9 April 2026, 28 Koridang AC By Election dak sendakba nung, Khensa yimtak Candidate Declaration asütsü atema Khensa Senso Mungdang (KSM) office ajanga temetetsütem yamai sangdonger.

1. Candidate ajak anogo ka nung dang declaration asütsü. Iba sentong 28th March, 2026, 10:00 AM nungi tenzüka agütsü.
2. Declaration anogo nung Candidate den temeiner nisung 20 dak tema arutsü memelar.
3. Temzüngi memelaba achi ajemtsü/chiyongtsü süngküm telongi bener arutsü memelar.

<p>Sd/- Purwati President, KSM Ph. No. 8929829118</p>	<p>Sd/- Chubawati Secretary, KSM Ph. No. 9366008562</p>
--	--

State affairs tir mapa abentsü Kim Jong Un shimshiogo



Seoul, Metsüremi/March 23 (Agencies): North Korea nung lenir Kim Jong Un, state affairs tir mapa abentsü tanaben shimshiogo, ta state media KCNA-i Hombarnü sangdonger ka ajanga metetdaksü. Anogo ka tejakdang Supreme People's Assembly mezüngbuba session ayongba sülen iba osang ya metetdakja liasü.

Pyongyang nung tang agia aliba senden nung socialist constitution atema amendment aser supplement tem sensak asemstü, aser iba den State Affairs Commission mendenbuba aser tanga lokti tentet balala lenirtem shimsü atema election agütsü.

North Korea indang rubber-stamp legislature, koba ajanga state policy tem formally agizüker iba assembly ya Workers' Party Congress agiba sülen party telemtetbatem ozüng kumdaktsütsü asoshi amener. Senden nungsa February ita party congress tekububa amenba mapang taruba küm pongu atema linük rongsenketzüng sentongtem sangdonger lepa repringshitsü.

Kasa mapang nung Pyongyang-i, linük lenir Kim Jong Un-i South Korea anema policy ana benoker aliba ya

formalise asütsü asoshi constitution lepa repringshitsü merpringshitsü, aji jangjatsü atadar.

Kütem tsünga Kim-i South den longjemtsü atema mapang talangka nungi Pyongyang nükjidong aliba toktsüogo aser South ya parnok tsükchir ta sangdonger.

Kim tenu Kim Yo Jong, State Affairs Commission züngsem rongnung densema maliasü, koba lai 2021 küm nungi tenzüka aruogo.

South Korea indang ?Unification Ministry-i ashiba agi, la kechiba meshim aji asadangdar, saka ken o asadangtertemi ashiba agi, iba jenjang agiba tetezü la sentokerba masü.

"La meshimba ya la jenjang meketi akümba ka masü saka mapa lemdangtsü asoshi tasa ka lir," ta Kyungnam University nung professor Lim Eul-chul-i ashi. Lai Workers' Party nung shilem tuluba ka agütsü imlar.

HINDUSTAN PETROLEUM CORPORATION LIMITED
(A Maharatna Company)
Petroleum House, 17, Jamshedji Tata Road, Mumbai-400020

METONGSHITSÜR

Ref. HPCL DCA cum CS Advt. dated 10.02.2026 & 11.02.2026. Last date 21.04.2026 tashi atsülangogo. Osang iba dak tali metettsü asoshi <https://petchem.hpcl.co.in/dca-cum-cs> nung angütsü. Helpline: 8169234083 (Anepdang 10 ako nungi nikongdang 5 ako tashi, public holidays dak alaka Hombarnü Hokuibar tashi).

Kohima Pickleball Classic Tournament tembangogo



Kohima, Metsüremi/March 23 (TYO): Ahibi Sports-i teyari agüja asayaba Kohima Pickleball Classic Tournament 2026 Heritage Pickleball Arena, Old DC Bungalow, Officers Hill, Kohima nung takok ngua asayaogo.

Iba asayamung ya March 21 aser 22 nü asaya, kong category balala nung asayatem aikati shilem agiogo, aser iba ajanga Nagaland nung pickleball asaya kanga nungtugu akümba sayur.

Asayamung nung asayar 80 dak tema category balala nung asayaogo, kong tebur tarep, tetsür tarep, tarep temeyoktep, Team asaya aser Veteran tarep (Challengers) asaya densema liasü.

Asayamung nung asayar tasen aser tejentem aika temaba jenjang nung kanga toktepba asayaba nguogo. Asayamung

nung ajak senteper senpet sen 1,00,000 agütsü aser iba ajanga asayatem nem parnok sempet, teamwork, aser sportsmanship sayutsü asoshi maongka agütsüogo.

Asayamung nung shilem agirtem:

* Tarep temeyoktep asaya - 22 Teams

* Tebur tarep asaya - 20 Teams

* Tetsür tarep asaya - 8 Teams

* Team Event - 8 Teams

* Veterans Doubles /

Challengers - 8 Teams

Asayamung result:

Tarep temeyoktep asaya :
Winners: Vilasier Khate & Manaseinee Hazarika

Runners up: Anangsha Alomyan & David Murry

Tetsür tarep asaya:

Winners: Manaseinee Hazarika & Anangsha Aloñ

Runners up: Eyen Yanthan

& Chubasenla aier

Tebur tarep asaya:

Winners: Tonoto Ayemi & David Murry

Runners up: Imsurem Longchar & Nzamo Kikon

Team Event

Winners: The Home Court

Runners up: The Rally Social Club

Veterans Doubles

(Challengers Category)

Winners: Abu Metha & Vikhozolie Khate

Runners-up: Rohan Abraham & Lhouvi Punyu

Kohima Pickleball Classic ya state nung pickleball asaya ajungketsü atema tongtumbang alizüng ka lir. Asayamung nung asayar aikati shilem agia kanga toktepba asayaba ajanga iba asaya Nagaland nung kanga kara renloka aoba aser tongtumbang asaya ka akümtsü ana nung aliba sayur.

TTP-i bendanger asayatem nem tekümdangtsü metetdaksü

Metsüremi/March 23, 2026 (Agencies): 11buba Pakistan Super League (PSL) ya March 26 nü tenzüksü lir, saka Tehrike-Taliban Pakistan (TTP) puri bendanger asayatem dang iba asayamung nung shilem magitsü tekümdangtsü metetdaksüba ajanga tetsükdaksü adoker lir.

TTP nungi jakzükbä Jamaat-ul-Ahrar faction-i bendanger asayatem dang iba asayamung nungi atsüingintsü metetdaksüogo.

League ya ki shibanga yur Karachi aser Lahore na nung asayatsü telemteba agiba sülen tang iba teblemstsü ya temai adokogo.

'Islamabad Post'-i, TTP faction Jamaat-ul-Ahrar-i tekümdangtsü metetdaksüba ya lemsatepa liasü. Parnoki asayatem dang pei taküm kümzüka ayutsü ya tongtumbangsa agitsü aser asayamung nungi atsüingintsü metetdaksü

"Tanü Pakistan nunger aser talisa Khyber Pakhtunkhwa

asur Balochistan nung alirtem military-i rishikangshiba ajanga timtem tekangshi tulu ajangshidar. Onok yimongtem mangyim agi sünger aliba mapang Pakistan Super League (PSL) ayongzüka asayaba ya onok timtemtekangshi tilutsüba ka lir. Iba tesem temeket ajunga timtem nung aliba mapang iba amala sentong ayongzükbä ya komu nung metzü melangtsüba ama lir, koba onoki magizüker," ta Jamaat-ul-Ahrar-i sangdong nung shia lir.

"Onoki PSL nung asayatsü aliba asayatem aser talisa bendanger asayatem dang tensa apir parnok kümzüka toktsütsü ta tenangzükbä magütsütetsü. Tia tensa apir pei taküm kümzüka ayutsü asoshi tongtumbang süa jenjang agia asayamung nungi atsüingintsü ajangshir," ta kasa sangdong ajanga metetdaksü.

Iba telok yagisa parnoki cricket asaya anemer masü saka asayamung ayongba mapang ya meshidak ta shiogo.

Jamaat-ul-Ahrar otongdar kati iba osang ya The Sunday Guardian den sensaksemba mapang jangjatsüogo. "Onoki ken o dak sendaka aliba cricket board tem dang parnok asayatem Pakistan-i meyoktsü ajangshir. Langka kar danga atalokra aji onok khuret masütsü. Onoki tekümdangtsü metetdaksüatokogo," ta pai ashi.

Iba tetezü asaya nokdangtsüba asü ta asüngdangba mapang pai, "hau asaya masayadaksütsü aser asayatem masayadaksütsü asoshi onoki takokba tashi inyaksü," ta langzü.

Taküm PSL nung David Warner, Steve Smith, Moeen Ali, Devon Conway aser Adam Zampa nunger densema bendanger asayar aika lir.

Hombarnü Steve Smith Multan Sultans nung dena iba asayamung nung mezüngbuba asayatsü atema Pakistan tongogo.

Asayamung ya March 26 nungi May 3 tashi asayatsü.

Antoine Griezmann Orlando City SC nungi asayatsü renema lir

Metsüremi/March 23, 2026 (Agencies): France nunger nungtugu asayar Antoine Griezmann, Orlando City SC nungi küm ana asayatsü asoshi renema lir, ta ESPN sangdong ka ajanga metetdaksü. Pa den tenangzüktepba yangluba nung ano küm ka atsülangtsü asoshi lenmang lapoka yua lir.

Atlético Madrid forward Griezmann ya Deobar aonung Real Madrid goal 3-2 agi makokba asaya nung asayaba sülen tenangzüktepba yanglutsü atema Orlando-i oa liasü, ta osang ajanga metetdaksü. Pa iba MLS club nungi July ita nungi tenzüka asayatsü imlar. Griezmann, season tatem tashi Atlético Madrid nungi asayatsü. Parnok FC Barcelona den UEFA Champions League quarterfinal aser Real Sociedad den Copa del Rey final asayatsü lir.

Taoba mapang France nunger nungtugu asayar shiba 2018 FIFA World Cup akokba team nung densema liasü, pa 2024 küm international football asaya nungi anisüngzüko.

Taoba mapang osang balala ajanga ashiba agi, Griezmann ya La Liga season matem tsüngda Orlando-i aotsü asoshi

jembishinüa liasü, saka Atlético Madrid nungi season tembanga asayatsü asoshi telemteba agia liasü.

Griezmann-i Atlético atema goal 210 idakja pa ya club nung ajak dang goal timtiba idaktsüba asayar lir, saka pai manager Diego Simeone kübok tongtumbang asayamung ka danga koka mali.

Griezmann-i kechi telemteba agidir aji pai pusemstsü ta Simeone-i shiogo. Griezmann-i Atlético nungi 2027 küm tashi asayatsü tenangzüktepba yanglur lir.

Major League Soccer's summer transfer window ya July 13 nü lapoktsü.

The New York Times sangdong ka ajanga ashiba agi, Griezmann ya 2027-28 season tashi asayatsü aser 2028-29 season-a asayatsü asoshi tenangzüktepba yanglushitsü lenmang lapoka yuogo.

Griezmann-i, pa Major League Soccer nung asayatsü tejangraba aliba lemsatepogo. Pai America nung asaya aser sobaliba kanga sakloker aser aiben US semdanga arudar, kong pa NBA asayatem repringba nguogo.

Miami Open: Korda-i world no.1 Alcaraz tsükdaksüogo

Metsüremi/March 23, 2026 (Agencies): World number one Carlos Alcaraz Deobarnü Miami Open tasembuba round nung world no. 36 America nunger asayar Sebastian Korda-i 6-3, 5-7, 6-4 agi tsükdaksüogo.

Korda-i tang mezüngbuba world number one asaya ka kokogo. Kasa mapang nung Alcaraz tang agi küma anabuba atonga Miami Open nungi kanga kara tsüko. Alcaraz-i iba asayamung ya 2022 küm akok, saka taoba küma pa Belgian nunger David Goffin-i tanabuba round nung tsükdaksü liasü.

Asaya nung tanabuba set nung 5-4 ta aliba mapang Korda-i asaya akoktsü asoshi maongka liasü saka Alcaraz nem pa indang serve break südaksü.

Iba sülen Alcaraz-i taruba game ana akok aser iba ajanga deciding set asayatsüsa aküm. Tasembuba set nung Spain nunger asayar yagi taliba nongshia asaya saka Korda-ia kanga meranga asaya aser Alcaraz indang serve ka break süa pai iba asaya koka liasü.

"Asaya akokba atema kanga

pelar," ta Korda-i ashi, shiba tang tashi nung world no. 15 tonga asayar lir. Pa yiruba ajanga season ana tashi junga masayateti aruogo.

"Ni bilemba dang nungi talila belemogo, saka ni asayaba yimya aser asaya tepeyong metoktsüi asayatetba atema pelar.

"Pa ya lenla ajak nung tamamangtsü asayar ka lir, pa kanga junga arakzüa asayateter aser aji dang masü volley, forehand, backhand ajak kanga junga asayar, pai minyaktetba kecha mali," ta Korda-i Alcaraz indang ashi, shiba January ita Australian Open koka Grand Slam pezüprongla akokba asayar tanobusang küma liasü.

Iba sülen arishi küm 22 tain Spain nunger asayar yagi Doha nunga asayamung ka koka pai 2026 küm asaya ka nung danga tamakok mongui asaya 16 akok, saka pa iba ita Indian Wells semifinal nung tamakok ngua liasü.

Korda taruba round nung Spain nunger qualifier Martin Landaluce mesüra 14th-seeded Karen Khachanov den asayatsü.

BILEMDANGANG

"Nai tangar dang nungi kechi imlar yamaji naia inyakang."